

Шавкат ХУРРАМОВ



Ой тўлишган оқимом



00000033480

Шавкат Хуррамов

ОЎ ПЎ ЛИШТАН
ОҚШОМ

Шеърлар

Тошкент
"Turon zamin ziyo"
2013

УДК: 821.511

ББК 84(5Ў)7

Х 74

Хуррамов, Шавкат

Ой тўлишган оқшом (шеърлар) / Ш.Хуррамов, -
Тошкент: "Turon zamin ziyo" нашриёти 2013. - 76 б.


ISBN 978-9943-25-414-5

Яхши шеър ўқиган одамнинг кўнглида ўз-ўзидан яхши кайфият уйғонади. Ушбу тўпلامдаги шеърлар ҳам ўйноқилиги, лирикага бойлиги, севги-муҳаббат, вафосадоқат, дўстлик-биродарликни тараннум этишдаги ўзига хослиги билан ўқувчида яхши таассуротлар уйғотади, деган умиддамиз.

Тақризчи:

Олим Усмонов,

филология фанлари номзоди



ISBN 978-9943-25-414-5

© Х. Хуррамов,
© "Turon zamin ziyo"
Тошкент, 2013.

*Яхши бўл, гар сени олам десинлар, майли, ёмон,
Яхшидир ёмон бўлиб, беҳабар бўлгандан замон.*

АЁЛЛАР

Сиз гузал ва лобарсиз, сиз Лайли-ю Ширинсиз,
Сиздадир ҳаё-ибо, сиз туфайли биз ҳаёт.
Сиз келтирган дунёга улуг зотлар бизга ёд,
Сизлар борсиз ҳамиша тинчлик бўлсин барҳаёт.

ШЕЪРИЯТ

Кўшиғим, куйим бўлган,
Дилда борим, шеърият.
Орзуйим-ўйим бўлган.
Вафодорим, шеърият.

Дарёдек жўшиб келар,
Дунёни кезиб келар,
Қалбимни эзиб келар,
Сирдошимдир шеърият.

Ухлаганда тушимда,
Баъзан эса ҳушимда,
Менинг ҳар бир ишимда
Ҳамроҳимдир шеърият.

Сўзлар бўлсам қувончим,
Сирим айтар ишончим,
Йиғлаганда юпанчим,
Юрагимдир шеърият.

ШАЙТОН ТУРИБДИ

Бизнинг орамизда кўринмай сира
Сездирмай пинҳона кезиб юрибди.
Йўлдан оздирмоқни бурчи деб билган
Сени бошқармоққа шайтон турибди.

Карнинг қулоғида, кўрнинг қўзида,
Гунгларнинг тилида, соқов сўзида,
Ўзал жамолида, аҳмоқ юзида
Чордона жойлашиб шайтон турибди.

Номард режасида, нодон кўнглида,
Фоҳиша қўйнида, қинғир қўлида,
Ёлғончи аҳдида, дайди йўлида
Хизматга шайланиб шайтон турибди.

Мастнинг елкасига миниб юрганин
Ожиз бу бандаси қайдан билибди.
Шишанинг ичида бетоқат бўлиб,
Очсанг, чиқаман, деб шайтон турибди.

Шайтондан қочиб мен узоқлаб кетсам,
Қўйган тузоғидан амаллаб ўтсам,
Йиқилиб-суриниб қутулдим десам,
Қўлтиғимдан суяб шайтон турибди.

Фойдаси йуқ, Шавкат, унда кўп ҳийла,
Ўзгаларни қўйиб, ўзингни ўйла,
Ўлсам гар, Худойим, жаннатга жойла,
Дўзахдан қўрқаман, шайтон турибди.

КИМ ҚОЛАР?

Кимлар имкон бўлса, олдинга чопар,
Ким эса пиёда, секин юради.
Шошган инсон балки адашиб қолар,
Секин юрганлари олдин боради.

Кимлар кўзи ожиз, қалби кўради,
Кимлар соппа-соғу кўрдай юради.
Кимлар саҳар чоғи ибодат қилса,
Кимлар чошгоҳда ҳам аранг туради.

Кимлар яхшилиқни шиор деб билса,
Кимлар буни оддий бир ҳол билади.
Кимлар йиқилганнинг қўлидан тутса,
Кимлар қулашига "ёрдам қилади".

Кимларнинг тили бор, гапира олмас,
Кимлар ноҳақ, аммо ҳеч тилдан қолмас.
Кимлар кимлардандир нолиб яшайди,
Яхшилар бировнинг устидан қулмас.

Кимлар тирик, гар жойи гўрда,
Кимлар яшамоқда мисоли мурда.
Кимларники доим бўсаға бўлса,
Кимсаларнинг ўрни албатта тўрда.

Кимлар етиштирар, ўзи емайди,
Кимлар болни ухлаб тушда кўрмайди.
Кимларнинг орзуси уйланиш бўлса,
Кимларни ёридан кўнгли тўлмайди.

Кимлар ёшлигидан онасиз қолган,
Кимлар боласини бошқадан олган.
Кимлар кимсаларни хор айламади,
Кимнинг косасига ким заҳар солган.

Кимлардан, сиз билинг, яхшидир ҳайвон,
Кимлар қаср қурдилар, кимники айвон.
Лекин, дўстлар, аммо бир нарса аён,
Ким қолар ўтмайин мисоли карвон.

БОБОДЕҲҚОНИМ

Бир қараб биласан бободехқонни,
Қўллари қаварган, кетмон урибди.
Қуёш ботган аммо ой шуъласида,
Ухламай далада ёлғиз юрибди.

Кундузи офтобда юзи қорайган,
Меҳрини борини ерга берибди.
Маржондек бошидан оққан терини,
Гоҳи енги билан артиб турибди.

Бир пиёла чойни ҳам ором ичолмай,
Ҳаётдан кўнгли тўқ мамнун юрибди.
Камтарона тўй қилмоқ орзусида
Кун эмас ой эмас йиллар кутибди.

Сизлар бор дастурхон ноз-неъматга мўл,
Ўзингиз тўқмисиз, Бободехқоним.
Турна келар қатор кўзлагани кўл,
Санокда йўқмисиз, Бободехқоним.

КАКАЙДИМ

Киндик қоним оққан кўзимни очган,
Барча юртдан менга гўзал Какайдим.
Полвонингни кўрган майдондан қочган,
Сенга ёзар бўлдим ғазал, Какайдим.

Ўрису қозоғинг, татарларинг бор,
Ўзбек, тожик ҳамда арабинг бисёр.
Миматларга бой бўлган гўзал диёр,
Фахрлансам арзийди сенла, Какайдим.

Омонхон ҳуснингни зиёда қилди,
Кўркингга кўрк қўшди, бир қаср қилди.
Раим қилган савобни халқим кўрди,
Мардларни бағрига олган Какайдим.

Заҳматкаш деҳқонинг — Усмонларинг бор,
Тупроқдан ундирар олтин ила зар.
Кимлар остонангни бир кўришга зор,
Сенга тариф йўқдир, она Какайдим.

Қора олтининг бор бахт сенга боқди,
Қанча хонадонинг чироғин ёқди.
Аму-занг каналинг тескари оқди,
Мўъжиза майдони бўлган Какайдим.

Ҳар қадамда ошхонанг халқ доим тўқ,
Хизматда гўзаллар ҳеч бир тенги йўқ.
Қошларинг ёй бўлса киприкларинг ўқ,
Бағрикенг диёрим, гўзал Какайдим.

Иймоним, виждоним соним, сен ўзинг,
Оғзимдаги ҳалол ноним, сен ўзинг.
Томиримда оқар қоним, сен ўзинг,
Шуҳратим, шавкатим, шоним, Какайдим,
Сенга фидо бўлсин жоним, Какайдим.

БЎЛМАСА

Узоқ сафар чиқолмайсан
Чўнтакда боринг бўлмаса,
Юз йилинг бир кунга тенгмас
Вафоли ёринг бўлмаса.

Вақтингни сен бил ғанимат,
Имкон бўлса кўрсат қиммат.
Обруйингдир пулга қиммат,
Гар дуоғуйинг бўлмаса.

Бу дунёдан ҳар ким ўтар,
Канда қилмай рўза тутар.
Беш вақтинг ҳам бекор кетар
Падаринг рози бўлмаса.

Савоб ишни нокас қилмас,
Берай деса кўзи қиймас.
Қанча бўлса ҳамки тўймас,
Ўрни қабрда бўлмаса.

Хатоларинг оширади,
Тили билан тоширади.
Хизматингни яширади
Яхши қариндош бўлмаса.

Баъзилар бор эгри қўли,
Баъзиларнинг қинғир йўли,
Заҳардан аччиқдир тили
Борганда қўлда бўлмаса.

Ким боласин қилдирар хор,
Кимлар эса тирноққа зор.
Нодон биландир гўзал ёр,
Бири кам дунё бўлмаса.

Яхшилик ерда ётмайди,
 Ҳақиқий дўстлар сотмайди.
 Туғишганга тош отмайди,
 Иймонсиз аҳмоқ бўлмаса.

Ёмонлар билан дўст бўлма,
 Фақирлар устидан кулма.
 Бошингни минг жойга урма,
 Пешонангда у бўлмаса.

Кимлар борки асли ёмон,
 Ёмон бўлса қолмас омон.
 Дангасага энди замон
 Балки баҳона бўлмаса.

Бу дунё бир синамоқдир,
 Ҳамма жойи ҳам ямоқдир.
 Яхши-ёмон яралмоқдир
 Охир замона бўлмаса.

Шавкатжон, бил, ўрнинг қайда,
 Ўралашма сен ҳар жойда.
 Шеърларингдан сукут фойда,
 Агар харидор бўлмаса.

БИЛМАЙСИЗМИ?

Дўстлар даврасида сўз менга етди,
 Шеърлар айтсам энди, сиз тинглайсизми?
 Сизларсиз лаҳзалар йиллардек ўтди,
 Нега шундай бўлади, билмайсизми?

Билсанг дўстдан ортиқ сирдошинг бўлмас,
 Хаста бўлсанг сохта дўст кўнглинг олмас.
 Содиқ дўстнинг соғинчи тинчлик бермас,
 Нега шундай бўлади, билмайсизми?

Баҳор ўтиб кетар, қиш етиб келар,
Чархпалак сингари йиллар айланар.
Дўстга дўстнинг доим кўнгли боғланар,
Нега шундай бўлади, билмайсизми?

Беш кунлик дунёмиз дўст билан гўзал,
Шоирлар бу ҳақда ёзади ғазал.
Яхши дўст ширинсўз даврани безар,
Нега шундай бўлади, билмайсизми?

КЎРГИМ КЕЛАДИ

Шоир эмасману ёзгим келади,
Сўзларни маржондай тизгим келади.
Мажнундек кезсам-да тоғу тошларни
Кўзларингни, жоним, кўргим келади.

Орзу канотида сузгим келади,
Тўлқиндай мавж уриб ўзгим келади
Кўнглимнинг таянчи, қалбим қувончи
Кўзларингни, жоним, кўргим келади.

Дунё турғунича тургим келади,
Сенинг сирларингни билгим келади,
Сокин тун оқшоми ой тўлишган чоғ
Кўзларингни жоним кўргим келади.

Ой юзли гўзалсан боргим келади,
Ёнингда бир умр қолгим келади.
Наврўзли баҳорим, эй гўзал ёрим,
Кўзларингни, жоним, кўргим келади.

СЕВГИМДАН ТОНДИМ

Ўн саккизга тўлган парини севдим,
Қирққа кирганида тегаман деди.
Унинг ишқида мен неча йил куйдим,
Қирққа кирганида тегаман деди

Гўзалнинг кўнглини била олмадим,
Шу сабаб ёнига кела олмадим.
У билан ўйнаб ҳеч тўя олмадим,
Қирққа кирганида тегаман деди.

Қирқ ёшга етганда элликка борсам,
Соч-соқол оқариб чимилдиқ кирсам.
Не бўлар тишларсиз тиржайиб турсам,
Қирққа кирганида тегаман деди.

Ёшликнинг гуллаган даври ҳам ўтса,
Орзулар ўрнини армонлар ютса.
Мен тенги дўстларим неvara кутса,
Қирққа кирганида тегаман деди.

Не қилай, Шавкатжон, мен ўтда ёндим,
Ишқнинг шаробидан, айт, қачон қондим.
Иложим йўқ энди, севгимдан тондим,
Қирққа кирганида тегаман деди.

БАРИСИ ЁЛҒОН

Тонг палласи йироқдан бир қуш
Чуғурчиқлаб сайрай бошлади,
Юракдаги ярамни тирнаб
Сен ҳақингда сўрай бошлади.

Эй гўзалим, баҳорни яна
Ўзинг билан бошлаб келдингми,
Ёлғизлигим кўриб саҳрода
Кўзларингни ёшлаб келдингми.

Аҳволимни сўрама, эй куш,
Юрагимни тирнама, эй куш,
Ўтди гўё бўронли бир қиш,
Бари ёлғон, бариси бир туш.

СУРХОНИМНИНГ ҚИЗЛАРИ

Қаранг гўзал қизларга,
Ёниб турган кўзларга,
Ширин-шакар сўзларга,
Сурхонимнинг қизлари,
Ойдан гўзал юзлари.

Дўстларини кулдириб,
Йигитларни куйдириб,
Суймагани суйдириб,
Сурхонимнинг қизлари,
Ойдан гўзал юзлари.

Ёғду сочар кечаси,
Ҳавас қилар нечаси,
Озодадир кўчаси,
Сурхонимнинг қизлари
Ойдан гўзал юзлари.

Илҳом келса, Шавкат, ёз,
Ёзсанг агар жуда соз,
Қанча ёзсанг шунча оз,
Сурхонимнинг қизлари,
Ойдан гўзал юзлари.

ОНАЖОНИМ

Онажоним, осмонга қараб
Сизга бир сўз айтмоқчи бўлдим,
Онажоним, юлдузингизни
Излаб-излаб топмоқчи бўлдим.

Бахтимга сиз доим бор бўлинг,
Барча ишда мададкор бўлинг,
Пойингизга гуллар экайин,
Сизга атаб шеърлар айтайин.

Онажоним, қучоғингизга,
Эркаланиб ётгим келади.
Оппоққина сочларингизни
Силаб-сийпаб қучгим келади.

Афсус ёшлик ўтмоқда, она,
Йиллар келиб кетмоқда, она,
Куздан нишона бергувчи умр
Баҳорини қўмсайди яна.

Онажоним, юлдузингни
Излаб-излаб топмоқчи бўлдим,
Онажоним, қучоғингизда
Эркаланиб ётмоқчи бўлдим.

СЎЗ ЯХШИ

Ушламадим бир бора
Мен ёримнинг қўлини,
Энди эса у гўзал
Кимларнингдир келини.

Соғиниб кўчасидан
Ҳар куни ўтгим келар,
Кўнглим эса узилмас
Бир кўриб кетгим келар.

Ишқ дардига даво йўқ
Дейдиларки одамлар,
Кўз ўнгимдан кетмайди
Ўша майда қадамлар.

Эй гўзалим, мен учун
Баҳор ёлғон, куз яхши
Ҳеч нарсa керак эмас
Бўлса ширин сўз яхши.

ИККИ ҚИЗ

Сой бўйида дўстлар ҳар куни
Бирга келар бўлди икки қиз,
Кўлларида ушлаб челагин
Сувга келар бўлди икки қиз.

Хаёлимни олди икки қиз,
Юрагимда қолди икки қиз.
Менинг дардим сиз тушунмайсиз,
Нима қилса қилди икки қиз.

Бу қизларнинг ёши ўн олти,
Ўн етими ёки ўн саккиз.
Энди эса менга фарқи йўқ,
Ёқиб қолди ўша икки қиз.

Шавкат, севгим изҳор айлайман,
Қай бирига, аммо билмайман,
Бир-биридан гўзал шахло кўз,
Кўз ўнгимда ўша икки қиз.

Хаёлимни олди икки қиз,
Юрагимда қолди икки қиз.
Менинг дардим сиз тушунмайсиз,
Нима қилса қилди икки қиз.

ЭСЛАДИМ

Бугун тонгда ногаҳон
Яна сени эсладим,
Согиниб ўша дамни
Саҳар туриб бўзладим

Осмонга боқсам агар
Ойда сени кўраман,
Тушларимда мен ўша
Сойда сени кўраман

Ёрим ўшанда сени
Чин кўнгилдан севганман,
Шунча гўзал қизлардан
Фақат сени деганман

Мени бахтсиз қилсангда
Бахтли бўлгин, ёрим сен,
Вужудимда, барибир,
Оқаётган қоним сен.

БИР КЕЛСА

Нима қилар, дўстларим,
Шу қизгина бир келса,
Айтармидим сўзларим
Шу қизгина бир келса.

Қиё боқиб ёр кулса,
Дардимга малҳам бўлса,
Чамансиз саҳро гўзал
Шу қизгина бир келса.

Борар бўлсам у кутса,
Номимга мактуб битса.
Дунё билан ишим йўқ,
Шу қизгина бир келса.

Шавкат, ойни кўзлама,
Кўлинг етмай бўзлама.
Рад жавобин оласан
Шу қизгина бир келса.

БЎЛИШИНГ КЕРАК

Билиб, балки билмай юрсанг ҳам,
Сен меники бўлишинг керак.
Кўзга ёки илмай юрсанг ҳам,
Сен меники бўлишинг керак.

Шамол тўсса юрар йўлимни,
Хазон урса боғда гулимни,
Гар сув босса ҳатто чўлимни,
Сен меники бўлишинг керак.

Тонг отади, ботар қуёшим,
Оқар бўлса кўздаги ёшим.
Кўтарилмай қолса ҳам бошим,
Сен меники бўлишинг керак.

Оғиздан гар келса ҳам сўлак,
Мадорсиздек толганда билак.
Урмай қолса ҳаттоки юрак,
Сен меники бўлишинг керак.

Куним битиб, тўлса паймоним,
Жаннатларга руҳим равоним.
Келса ҳамки охир замоним,
Сен меники бўлишинг керак.


ХАФА БЎЛМА

Гўзал ҳуснингга тўймай
Боқсам гар хафа бўлма,
Кўз ёшим дарёсига
Оқсам гар хафа бўлма.

Пояндозман йўлингга,
Ошиқ бўлдим бўйинга,
Соғиниб мен уйинга
Борсам гар хафа бўлма.

Юрагим ғамга ботар,
Кўнглим ёнингга тортар,
Афсус сенсиз тонг отар,
Сўйласам хафа бўлма.

Бу дунёдир бевафо,
Кўрмаган борми жафо,
Қилмас бўлсанг сен вафо,
Куйласам хафа бўлма.



ҚАРМИКАН

Сурма қўйиб шаҳло кўзлар
Менга қиё боқармикан,
Ой шуласин сочса, дўстлар,
Юрагимга ёқармикан.

Гўзал ёрим, сарвинозим,
Эшитгайми чертсам созим,
Баҳор ўтиб келса ёзим,
Қишим эса олармикан.

Қуласа гар тоғда тошлар,
Оёқ ости бўлса бошлар,
Селдек оқса кўздан ёшлар,
Бир бор раҳм қилармикан.

Оппоқ либос кияр бўлса,
Ўзга ёрни суяр бўлса,
Шавкат ғамда куяр бўлса,
Яна ўтда ёқармикан.

АРМОНЛИ ДАМЛАР

Биз ҳам анҳор бўйида
Қўл ушлашиб юрганмиз,
Кечалари тонггача
Бирга хаёл сурганмиз.

Гулзорларни оралаб
Қувлашмачоқ ўйнардик,
Бир-биримизга боқиб
Сира-сира тўймасдик.

Юлдузларни санашиб
Тонгларни отдирганмиз,
Балки Лайли-Мажнунни
Ортда ҳам қолдирганмиз.

Ўша тонгда булбуллар
Бизга атаб куйлашди,
Узун-узун орзулар
Осмон билан бўйлашди.

Тушимдамас ўнгимда
Сочларин силаганман,
Ой каби гўзал юзин
Қуёшдан қизганганман.

Афсус, гўзал баҳорим
Бугун қишга айланди,
Севгилим, ўша дамлар
Наҳот тушга айланди.

Бевафо ёримни деб
Эссиз ёнганим қолди,
Юрагимдан бир умр
Шеърият ўрин олди.

Не қилай, дўстлар, бугун
Юракда кўп алашим,
Яна сизга не дейин
Ишонганим-қалашим.

ЁТ БЎЛДИ

Севги шаробидан дилим маст бўлди,
Юрган йўлим гоҳо баланд-паст бўлди,
Дўстлар қолиб бугун душганим кулди,
Ёр деб ишонганим энди ёт бўлди.

Не қилай, қанчалар соғиниб кутдим,
Ҳар куни эшигинг ёнидан ўтдим,
Неча бор номингга мактублар битдим,
Ёр деб ишонганим энди ёт бўлди.

Билмадим севгими армон ё ҳавас,
Юракдан фақат сен жой олдинг холос,
Гўзалим, дардимни эшитгин бир оз,
Ёр деб ишонганим энди ёт бўлди.

ҚАЙГА БОРАМАН

Мен сенга дер эдим сени оламан,
Сен айтардинг ҳали мен ёш боламан,
Бўлган ишга энди ҳайрон қоламан,
Ёрим, сени ҳар куни соғинаман.

Айтаверсам бу дардимнинг чеки йўқ,
Ишонибман сенга яна кўнглим тўқ,
Сен кетдинггу юрагимга ботди ўқ,
Айт-чи, ёрим, сенсиз қайга бораман.

Эсингдами учрашувга борардим,
Ҳаё қилиб мендан нари борардинг,
Нозланиб сен секин қиё боқардинг,
Бу дамларни, айт, қандай унутаман.

Анҳорларнинг бўйига ёлғиз бориб,
Узоқ хаёлларга ботиб қолама.
Фақат зилол сувга кўнглимни ёриб,
Руҳан сен томонга учиб бораман.

АЛИШЕР

*Орамиздан эрта кетган дўстим
Алишернинг хотирасига*

Баҳор ўтди, ёз ўтди,
Сен қайтмадинг, Алишер,
Шунча дардинг бор экан
Сўз айтмадинг, Алишер.

Айтар бўлсанг сўзларинг
Меҳмонга уй тор эди,
Қанча-қанча дўстларинг
Сухбатингга зор эди.

Айбдордай уйингга
Боролмадик одамдай,
Фарзандларинг ҳолини
Сўролмадик одамдай.

Хаёлимда Назокат
Бизни кўрса қон бўлар,
Бу ҳаётда ўзича
Тирикларга сон бўлар.

Кўз тегмасин қизингга
Барчинойдай бўлибди,
Акмалжонинг ўрнингда
Лочиндайин юрибди.

Кунлар ўтди, тонг отди,
Сен қайтмадинг, Алишер,
Шунча дардинг бор экан
Сўз айтмадинг, Алишер.

СИЗДАЙ БЎЛОЛМАЙДИ

Баҳовуддин қабристонига шарқона услубда дарвоза қўйишди. Бу савоб иш Раим Қаямов томонидан амалга оширилди

Раим ака савоб ишни қилар бўлди,
Муҳтожларни кўрса бошин силар бўлди,
Ойтош опа билан даврон сураб бўлди,
Одамлар бор, лекин сиздай бўлолмайди,
Савоб ишни ҳар инсон ҳам қилолмайди.

Омадингиз тижоратда синадингиз,
Қанча заҳмат чексангиз-да чидадингиз,
Бахтингизни меҳнатингиздан топдингиз,
Одамлар, бор лекин сиздай бўлолмайди,
Савоб ишни ҳар инсон ҳам қилолмайди.

Баъзилар бор, жиғилдонни очар бўлди,
Йўқдан олиб доим борга сочар бўлди,
Мазлум кўрса ортга қараб қочар бўлди,
Одамлар бор, лекин сиздай бўлолмайди,
Савоб ишни ҳар инсон ҳам қилолмайди.

Баъзиларнинг қўша-қўша давлати бор,
Биров билар биров билмас савлати бор,
Қанча бўлса ҳамки дўстлар бир ўзи бор,
Одамлар бор, лекин сиздай бўлолмайди,
Савоб ишни ҳар инсон ҳам қилолмайди.

ҚИЗҒАЛДОҒИМ

Қизғалдоғим, келиб ёнингга
Чўкка тушиб хаёллар сурдим,
Ловуллаган юзингдан сенинг
Олам-олам қувончни кўрдим.

Қизғалдоғим, бўйингни энди
Бўйим билан бўйламайсанми,
Менинг учун, жоним, бир бора
Кўшигингни куйламайсанми.

Қизғалдоғим, умринг неча кун
Билмаганинг сабаб яйрайсан,
Шунинг учун балки ҳолимга
Ачинарли ҳолда қарайсан.

БЎЛГАНДА

Сенинг қадрингни мен кеч билдим, жоним,
Умримнинг анчаси ўтиб бўлганда.
Хатоларим энди ювгайми қоним,
Орзуларни армон ютиб бўлганда.

Кўнгил истар, аммо бораолмайман,
Хатто ҳолингни ҳам сўраолмайман.
Сенсиз бу оламини кўраолмайман
Омад бизларни тарк этиб бўлганда.

Балки бу дунёда омадим чопмас,
Ҳеч бир гўзал менга сен каби ёқмас,
Юрак йиғласа-да кўз ёшим оқмас,
Бахтли дамларимиз кетиб бўлганда

Шавкат, ёниб куйма, фойдаси бўлмас,
Муҳаббатдан, ишқдан ҳеч кимса ўлмас.
Яратган хоҳиши ўзгалар билмас,
Тақдирга азалдан битиб бўлганда.

ШАХМАТ ЎЙНА

Шахмат ўйна, шошмагин,
Ҳеч ҳаддингдан ошмагин.
Рақибингни ҳурмат қил,
Ютқазсанг ўзингдан бил.

Менингу йўқ омадим,
Қаерларда қолмадим.
Юришимдан шошаман,
Ҳам ҳаддимдан ошаман.

Кеча яхши ўйнадим,
Бори йўқ олти қолдим.
Мен ҳам ютсам бўларди,
Ҳурмат қайга қоларди.

Ўн йил бўлди ўйнайман,
Ютуқ нима билмайман.
Хужумим яхши, бироқ,
Ҳимоям-чи чатоқроқ.

Пиёдамнинг изидан
Отларимни сакратдим,
Кўп қурбонлар бой бериб
Рақибни довдиратдим.

Бу ҳужум эвазига
Осмонимга ой бердим,
Ойдаи бўлган отимни
Байталига бой бердим.

Ниҳоят топширсамми
Ё мўъжиза кутсамми,
Мотдан умид бормикан,
Потдан умид бормикан.

Вазиятим ёмондир,
Аҳволим эса тангдир,
Энди охирги чора
У ҳам бўлса фирромдир.

Куч билан ютолмадинг,
Хатомдан фойдаландинг,
Сўнг жанжални бошладим,
Рақиб кўнглин ғашладим.

Атрофимга қарасам,
Мухлисларим кўп эди,
Ахир, мен нима қилай,
Бошқа чорам йўқ эди.

Шахматни бузиб ташлаб,
Мот бўлдинг деб бақирдим.
Билмаганлар ютди деб,
Билган эсин ебди дер.

Аму-зангнинг суви ҳам
Бир кун тиниқ оқади,
Шунда, дўстим, мен томон
Омад кулиб боқади.

ЎЗБЕКНИНГ АЁЛИ

Сунбул соч, қирқ кокил, тим қора кўзлар,
Ўзбекнинг аёли, ўзбек аёли.

Хаёли иболи, ноз ила сўзлар
Ўзбекнинг аёли, ўзбек аёли.

Уни кўрсанг эди баҳор келганда,
Эгнига атласдан либос кийганда,
Олам яшнаб кетар бир бор кулганда,
Ўзбекнинг аёли, ўзбек аёли.

Кечаси ухламай аллалар айтган,
Бешикка суяниб ҳайкалдай қотган,
Рўзғор ташвишидан қачон тинч ётган,
Ўзбекнинг аёли, ўзбек аёли.

Кўнгли нима истар, сўраб билдингми,
Эй номард, қўлига бир гул бердингми,
Фариштаку ахир, сен ҳам кўрдингми,
Ўзбекнинг аёли, ўзбек аёли.

Сизларсиз бизларга дунё не керак,
Сахрода бўлгандек мевасиз терак.
Сизни деб урмаса тўхтасин юрак,
Ўзбекнинг аёли, ўзбек аёли.

Шавкат, сўрофингга жавоб ўшалар,
Хокини кўзга сурт, савоб ўшалар,
Жаннатнинг ҳури ҳам, ё раб, ўшалар,
Ўзбекнинг аёли, ўзбек аёли.

ЎТАР

Эй дўстларим, бу дунёда
Не бир-не бир замон ўтар,
Ким отлиғу ким пиёда
Яхши ила ёмон ўтар.

Кимлар юрар кўкрак кериб,
Ким ризқин ҳалол териб,
Мардлар юртга қалқон туриб,
Номард фақат сонда ўтар.

Хизмат бўлса ортга қочиб,
Тилдан яхши-ёмон сочиб,
Тайёр ошга тўрга кўчиб
Сохта дўст ҳам ёнда ўтар.

Ой юзли ойнага қараб,
Парилардай сочин тараб,
На унга на бунга яраб
Шундай гўзал ёлғиз ўтар.

Таом бўлса юз ўгирмай
Ҳаром-ҳариш фарқин билмай,
Нажосат еб оғиз ювмай,
Минг йил яшаб қарға ўтар

Ҳадис айтар агар билсанг,
Жаннатда сен амал қилсанг
Қилган ишин ўзин кўрсанг,
Иккиланмай дўзах ўтар.

Қаранг шундай инсон кўрдим,
Ёқа ушлаб тавба қилдим,
Таҳорат йўқ, аниқ билдим,
Намоз вақти имом ўтар.

Ўз-ўзимга савол бердим,
Бу дунёда нима қилдим,
Фақат шунга амин бўлдим,
Бунда аҳмоқ беғам ўтар.

Жойнамоzга кўйиб бошинг,
Шавкат, саҳар оқиз ёшинг,
Сарҳисоб қил қилган ишинг,
Йўқса умринг бекор ўтар.

ДАРВЕШОНА ҚИЛАЙЛИК

Айтсам адо бўлмас кўнгилда сўзлар,
Келинг, дарвешона қилайлик, дўстлар.
Охиратни деган савобни кўзлар,
Келинг, дарвешона қилайлик, дўстлар.

Ўнг қўл билан узат, чапинг билмасин,
Мусулмон бандаси гийбат қилмасин,
Мардлар номардларга муҳтож бўлмасин,
Келинг, дарвешона қилайлик, дўстлар.

Деҳқонга ризқ берсин, барака берсин,
Фалокат йўқолсин, ҳосил мўл бўлсин,
Ёмонлик ўрнини яхшилик олсин,
Келинг, дарвешона қилайлик, дўстлар

БЕВАФО ДУНЁ

Бу дунё мен учун алдамчи дунё,
Бу дунё мен учун ёлгончи дунё,
Билмадим кимларга вафо килгандир,
Бу дунё мен учун бевафо дунё.

Кўзим юмсам, тушимга сен кирасан,
Қалбим ўртаб юракка ўт соласан,
Кўз очиб кўрганим, армоним ўзинг,
Билмам, яна қачон қайтиб келасан.

Ҳаётда нималар бўлиб ўтмади,
Бу дунёга кимлар келиб кетмади,
Жаҳонга танилган Навоий бобом,
Висол онларига у ҳам етмади.

Не қилай ҳаётнинг жумбоқлари кўп,
Не қилай йўлларнинг сиртмоқлари кўп,
Кундузим, юлдузим, ёрим сен ўзинг,
Сен ойсан атрофда юлдузларинг кўп.

ҚОЧА БОШЛАЙДИ

Шундай замон келар, эй аҳли инсон,
Отадан болалар қоча бошлайди,
Бойликка ҳирс қўйиб кетади имон,
Ҳаттоки онасин кўзин ёшлайди

Соқоли селкиллаб саксон ёшида,
Алифбедан ҳануз "А"ни билмайди,
Бир оёғи энди гўрнинг бошида
Савобдан гапирсанг жини суймайди.

Дўстлар, келар эмиш ҳали бир замон,
Эркаклар киймин аёл кияди.
Тавба қилдим кўзим кўрмасин ёмон,
Оғалар бир-бирин кўзин ўяди.

Ёлғон эгаллайди ростгўйларни сен,
Билмадим нечоғлик излаб топарсан.
Балки, замонамиз талаби шу деб,
Қўлга қурол олиб мени отарсан.

ОНАЖОН

Ўша оқшом менга қора тун бўлди,
Орзуларим энди армонга тўлди,
Она сиздан нохуш бир хабар келди,
Қани энди ёлғон бўлса, онажон,
Ажал тўлмай қолган бўлса, онажон.

Сафар чиқсам қўлларингиз дуода,
Меҳрингиз ҳам бизга энди зиёда,
Қабрингизга бориб энди пиёда,
Сизга атаб шеърлар тўқий, онажон,
Руҳингизга қуръон ўқий, онажон.

Она десам эзилади юрагим,
Она десам қақшаб кетар суягим,
Сиз эдингиз асли менинг керагим,
Гафлатда биз қолдик хайр онажон,
Жаннатда сиз қилинг сайр, онажон.

Олти ўғил, иккигина қизингиз,
Ўпиб йиғлар босиб кетган изингиз,
Унутмаймиз, она, берган тузингиз,
Бизлардан сиз рози бўлинг, онажон,
Хурлар билан бирга юринг, онажон.

СЕН ҚАЙДАСАН

Баҳор ўтиб, етиб келди куз,
Сен қайдасан, мен ёқтирган қиз.
Айтилмасдан қолди қанча сўз,
Сен қайдасан, мен ёқтирган қиз.

Умр ўтар мисоли карвон,
Сенинг васлинг юракда армон.
Ўзинг эдинг дардимга дармон,
Сен қайдасан, мен ёқтирган қиз.

Саволим бор, тўхта эй жанон,
Сен парисан, мен эса нодон.
Бир сўз айтай, кулсанг ҳам хандон,
Сен қайдасан, мен ёқтирган қиз.

Шавкат ошиқ, ойни суйдингми,
Ишқ дардида танҳо куйдингми,
Бу ҳаётдан энди туйдингми,
Сен қайдасан, мен ёқтирган қиз.

ҚУРИСИН

Юзингга иргитар йиртиқ ковушин,
Камбағал эшитса бойлик товушин.
Ҳасад қилманг, майли, йўқда ҳам бўлсин,
Кўрмаганни ё кўргани курсин.

Бир мазлум йўлиқса кўринмай қочар,
Йўқдан олиб доим у борга сочар.
Ҳароми каззобга дастурхон очар,
Кўрмаганни ё кўргани курсин.

Борсанг гар уйига тўқсон ясавул,
Тўй қилса қозонига ўзи бакавул.
Бермоқмас, олмоқни ўйлайди нукул,
Кўрмаганни ё кўргани курсин.

Шавкат, ҳар инсонга ҳалолдан берсин,
Меҳнат қилган банда роҳатин кўрсин.
Яхшиларнинг доим омади кулсин,
Кўрмаганни ё кўргани курсин.

МАКТАБИМ

Гўзал мактаб бағринга
Қани, олсанг кайтадан,
Йиллар ўтган сари мен
Соғинганим айтаман.

Қалам ушлаб қўлимиз
Ёзолмасдан турарди,
Ҳаяжондан юраклар
Тўлқинланиб урарди.

ОРЗУЛАР ОҒУШИДА

Бутун оламини кездик,
Бахтли инсон йўқ эди
Билсанг ўшанда биздек.

Эҳ мактабим, қанчалар
Соғинганим билмайсан,
Эртақлардай бошдан сен
Афсус қайтиб келмайсан.

КУТАРМИКАН

Қўлим узатсам сойга
Етармикан, дўстларим
Қўнгил берибман ойга
Кутармикин, дўстларим

Қалбим сирини билмай
Ҳолимга парво қилмай
Ёнимга бир бор келмай
Кетармикан дўстларим

Уйкум келмаса ётиб
Орзуга қолдим ботиб
Ёрсиз тонгларим отиб
Ўтармикан дўстларим

Тарк этсам ёна-ёна
Келмасам қайтиб яна
Менга ҳам бирор нома
Битармикан дўстларим

ЗАРИФА

Шаҳло кўзлар кўп аммо
Менга ёқар Зарифа,
Бунга гувоҳдир само
Зимдан боқар Зарифа.

Тунда ёруғ юлдузим,
Сенга бор айтар сўзим.
Жабр тортган бир ўзим
Кел ёнимга, Зарифа

Сенсиз бўлмас баҳорим,
Сувга тўлмас анҳорим,
Ўзингсан йўқу борим,
Мен борингман, Зарифа.

Шавкат ҳушига келмас,
Кимса сирини билмас,
Жамолингга ҳеч тўймас,
Беморингман, Зарифа.

Қошлари ёй Зарифа,
Чиройга бой Зарифа,
Кел ёнимга, нозланма,
Юзлари ой Зарифа

УКАМ

Сухандон Тоҳир укамизнинг хотирасига

Мени оғир дардга ташлаган укам,
Ҳаёт гирдобига бошлаган укам,
Бемаҳал кўзимни ёшлаган укам,
Нима қилиб қўйдинг, эй моҳир укам,
Ўттиз баҳор кўрган жон Тоҳир укам.

Овози юракни ларзага солган,
Тўйларда халқимнинг кўнглини олган,
Ўзидан биргина ёдгорлик қолган,
Нима қилиб қўйдинг, эй моҳир укам,
Ўттиз баҳор кўрган жон Тоҳир укам.

Дардингни айтмадинг, ичга ютдингми,
Бевафо дунёдан шошиб ўтдингми,
Муроджон тўйини кўрмай кетдингми,
Нима қилиб қўйдинг, эй моҳир укам,
Ўттиз баҳор кўрган жон Тоҳир укам.

Боғда гуллар эрта сўлмасин экан,
Душманларинг сиринг билмасин экан,
Ўдакнинг дадаси ўлмасин экан,
Нима қилиб қўйдинг, эй моҳир укам,
Ўттиз баҳор кўрган жон Тоҳир укам.

Ортимдан юрардинг ҳамон эслайман,
Сирдошим сиримни кимга сўзлайман,
Юрган кўчаларинг кўриб бўзлайман,
Нима қилиб қўйдинг, эй моҳир укам,
Ўттиз баҳор кўрган жон Тоҳир укам.

Чўққиларга тирмашаман қоям йўқ,
Йўлим узоқ пиёдаман, биям йўқ,
Тирикларга сонман фақат соям йўқ,
Нима қилиб қўйдинг, эй моҳир укам,
Ўттиз баҳор кўрган жон Тоҳир укам.

Сен кетдинг кўзимда аччиқ ёш қолди,
Нарзулла ўрнида жонли тош қолди,
Энди ёрилмаган фақат бош қолди,
Нима қилиб қўйдинг, эй моҳир укам,
Ўттиз баҳор кўрган жон Тоҳир укам.

ТЎРТЛИКЛАР

Бу кўҳна дунёда ростгўй кам қолди,
Гийбатлар ўчоғи аланга олди,
Келиб кетишингдан ҳеч бир маъно йўқ,
Яхшилар ошига ёмон қўл солди.

* * *

Эй нокас, шошилма, қайга чопасан,
Ҳаром йўллар билан бойлик топасан
Сенинг манзилинг ҳам жуда яқиндур,
Ўйлаб кўр қабрда қандай ётасан.

* * *

Ўзгага яхшилик тиласанг инсон,
Ўзинг ҳам яхшилик топасан, инон.
Яхшининг охири яхши бўлади,
Бу сўзни мен эмас айтгандир Қуръон.

* * *

Яхшилик уруғин яхши танлагин,
Яхшилар сўзини доим англагин.
Кимки нима экса шуни, ўради,
Яхшиси ўйлаб кўр, доғда қолмагин.

* * *

Мансабга ўтирса битта зоти паст,
Унга сиз ҳеч қачон қилмангиз ҳавас.
Манзили яқиндир узоқ боролмас,
Бир кун келиб ўрни бўлади қафас.

* * *

Йигитлик даврида белин боғлабди,
Савоб ишлар қолиб майни сайлабди.
Кексайиб манзили яқин қолганда,
Қуръонни куй қилиб қойил айлабди.

* * *

Ёмонни ёнингга йўлатма ҳаргиз,
Тили билан ошинг заҳар қилади.
Маломат тошини ёғдирар сўзсиз,
Магарким қоматинг гулдай сўлади.

* * *

Эй аҳмоқ, ҳар жойда юрсанг гар саёқ,
Бойлик илинжида тинмаса оёқ.
Молинг ҳам жонингга оро киролмас,
Бошингга тушган сўнг яхши бир таёқ.

* * *

Саёҳат истадим, дунёни кездим,
Хорижда кемаю қайиқда суздим.
Ҳеч миллат ўзбекдай бўлолмас мезбон,
Менга чой келтиринг, баридан бездим.

* * *

Замона зайлига боқа олмадим,
Сув эдим анҳорда оқа олмадим.
Кимлар нима қилса қилдилар аммо,
Мен эса ёлғонга ёқа олмадим.

Шукур қил, ўтган ҳар онинг яхшидир,
Ватан деб тўқилса қонинг яхшидир,
Ўзга юртда асал новвотингдан ҳам,
Ўз юртингда парча нонинг яхшидир.

* * *

Боримни бир пулга сотмоқ истадим,
Лаззатли онларни тотмоқ истадим,
Қошидан ёй ясаб, киприкдан камон,
Ул ёрнинг қалбига отмоқ истадим.

* * *

Махтумқули, ором яшамадинг сен,
Бахтинг учун ёлғон тўшамадинг сен,
Сенга ахир имкон берди шоҳ Фаттоҳ
Бу борада унга ўхшамадинг сен.

* * *

Сассиқпопишаклар эса тўймади,
Булбулни чаманга сира қўймади.
Нима ҳам дер эдинг, бошида тожи
Ўзгага йўл бўлсин, ўшалар ҳожи.

* * *

Юлдузли осмонга термулсаммикан,
Озғинлик қийнади семирсаммикан,
Баъзиларга ўхшаб бугунни уйлаб,
Ёлғонни сув қилиб симирсаммикан.

* * *

Баҳор турган жойда қишни суймайсан,
Булоқ сувларидан қониб тўймайсан,
Сенга не ёмонлик қилдим, эй кўпак.
Ўтган-қайтганимда ҳуриб қўймайсан.

* * *

Қанчалар ёкимли бўлса ҳам шеъринг,
Эшшак англамайди, сиз шуни билинг,
Унга ағанамоққа тупроқ кул бўлса,
Шунда юзидаги қувончни кўринг.

* * *

Бу замон бизларни ўйинчоқ билди,
Ҳайҳот устимиздан негадир кулди,
Қаранг ҳалол хизматкор гўё айбдор,
Фоҳишанинг тили бир қулоч бўлди.

* * *

Омадлининг қайга борса оши ёғлидир,
Бордан олиб йўқга берган марднинг ўғлидир
Эркаклар бор, ҳайбатини кўрган қўрқади.
Аслида бир жонли суръат хотин қулидир

* * *

Келибсан, кетишга навбат кутасан,
Яхшими-ёмонми бир кун ўтасан.
Иложинг йўқ, инсон, ҳолинг шу экан,
Нега ўйламайсан тоғни ютасан.

ЭНДИ

Юрак дардларимни, қўшиғим, сенга,
Ёрилиб ўлмасдан айтийин энди.
Қўшни қишлоқдаги оддий қиз менга
Паридек кўринса қайтайин энди.

Бир бокса берардим истаса борим,
Дилда қолиб кетди барча изҳорим.
Тоғлар қулар бўлди эшитиб зорим,
Умидим сўлмоқда нетайин энди.

Не қилай суяндим фақат сабрга,
Тақдирмикан балки бўлмадик бирга.
Кўнгил қўйманг экан у қалби кўрга,
Тонггача келмади, кетайин энди.

Баҳор келса йўқдир у сиз ифори,
Шунчалар гўзалки не бўлса бори.
Билолмадим, айтинг, ким ўзи ёри,
Номига дostonлар битайин энди.

ЁЛҒОНЧИ ДУНЁ

Сенинг дастингдан дод, бевафо, дунё,
Мудом кўрсатдингку кўп жафо, дунё,
Келганга қилмассан ҳеч вафо, дунё,
Бевақт қўшилибман сонингга, дунё,
Ёлғончи дунёсан, ёлғончи дунё.

Баҳоринг ўтмасдан гуллар килм тўқилди,
Ҳақиқат деганинг доим букилди,
Нодонни суядинг, доно йиқилди,
Чорладинг миннатли нонингга, дунё,
Ёлғончи дунёсан, ёлғончи дунё.

Қуёшинг ботмасдан ойинг кўринди,
Ана у жилғами, сойинг кўринди,
Йўқлардан беш баттар бойинг кўринди,
Ишонмам энди ҳар онингга, дунё,
Ёлғончи дунёсан, ёлғончи дунё.

Айтсам гар сийналар тўлди сўзлардан,
Ёшлар оқар бўлди ғамгин кўзлардан,
Розимиз сўрамай ҳеч бир бизлардан,
Кимларни тортмадинг домингга, дунё,
Ёлғончи дунёсан, ёлғончи дунё.

Бир эрни эплалмай юз эркакга бош,
Дуч келса суқланиб ўйнатади қош,
Аёл эмасдур у бир ялтироқ тош,
Ташна қилдинку сен қонингга, дунё,
Ёлғончи дунёсан, ёлғончи дунё.

Кўрларга ушлатиб ҳасса таёқни,
Чиройли тасвишлаб ёлғон бўёқни,
Ошиғи олчидир суюқоёқни,
Ўтлар тушсин хонумонингга, дунё,
Алдамчи дунёсан, алдамчи дунё.

КЕРАКМАС

Тун мен учун керакмас,
Қайғу, ҳасрат, надомат.
Уйқу қочар қасдма қасд,
Йўқ экан бир адолат.

Ёстиқ бўлди якка дўстим,
Суянчигим, сирдошим.
Нам бўлганда икки кўзим,
Удир артгувчи ёшим.

Ўлсам агар ўлимимни
Жудоликка йўймайман,
Лекин азиз суюгимни
Ёстигимни қиймайман.

Биродарлар, қабрга ҳам
Ёстиқ билан қўйингиз,
Йўқса менга нимадир кам
Ё кўксимни ўйингиз.

ТУРТЛИКЛАР

Айёминг муборак, сўнмас қуёшим,
Қалбимнинг тўридан унган гулчечак,
Чечакни суғоргай мангу кўз ёшим,
Бўлсин дея гўзал бахтли келинчак.

* * *

Жисмим гўё олов, юрагим ўтин,
Фамларим машъали ўтинга учкун,
Қуёшга талпиндим окибати шу,
Заррадек парчалаб йўқотди бутун.

* * *

Кун келиб лаҳадга эгилса бошим,
Ўрнингда бўлса гар кафан сирдошим,
Дил жаннат хуридан ором топарми,
Қабримга келмасанг, эй бағри тошим.

* * *

Қалбимда ишқ гули ўсгани сари,
Фамларим беридир, қувончим нари,
Не чоғлик ситами дилим этса чок,
Шунчалик хаёлим олди у пари.

* * *

Беҳуда гап сотмоқ бизга шон эмас,
Ганимнинг қувончи, қалбга жон эмас,
Ўйласам ҳаётда энг яхши оним
Дўстлар дийдоридан ўзга он эмас.

* * *

Ишқингда мажнунман, биларсан албат,
Барибир унутмам сени то абад,
Ўлмасам турарман устимни қоқиб
Тагин йиқилмоққа ҳуснингга боқиб.

* * *

Тагидан сув қўйиб ишловни бердик,
Кўкка бўйин чўзиб етилди терак,
Сўнгра томиридан болтани урдик,
Зора ўтинликка яраса керак.

* * *

Ўзбекнинг новвосу қўйлари бўлса
 Шунингдек узлуксиз тўйлари бўлса
 Дўстларнинг давраси яна ҳам кўркам
 Санъаткорнинг жўшқин куйлари бўлса.

* * *

Боримни бир пулга сотмоқ истадим,
 Лаззатли онларни тотмоқ истадим,
 Қошидан ёй ясаб, киприқдан камон,
 Ул ёрнинг қалбига отмоқ истадим.

ҚИЛМАДИНГ

Нечун иймонимни бутун қилмадинг,
 Ахир мен ҳам эдим ўзингга банда.
 Яратдинг, кузатдинг ҳамда синадинг,
 Ёлвориб сўрайман этма шарманда.

Туну кун тугамай дунё ташвишим,
 Сезмабман бир жойга борибди ёшим.
 Мен нодон ёстиққа текканда бошим,
 Англадим юрганим фақат бир сонда.

Номига ўзимни намозхон тутиб,
 Қўлимни узатиб порани кутиб,
 Фақирлар ёнидан узоқроқ ўтиб
 Энди азобини тортмоқ ёмон-да.

Қариндош ҳолини сўраб турмадим,
 Хасталар ёнига ҳатто бормадим.
 Ҳақ йулида бирор савоб қилмадим,
 Ҳайронман бу одат йўқ эди конда.

Дўстингман деб мени шайтон боплади,
 Йўлдан уриб ўз сўзини оқлади.
 На ўзимни, на сирымни сақлади,
 Пайдо бўлмай ўлсин ҳар куни ёнда.

Фойдаси йўқ экан сен тўлиб-тошма,
Бу дунё омонат — ҳаддингдан ошма.
Сўрамай оларкан қарими, ёшми
Шошилгин ўқийман дема аёнда.

Аҳли уммат, келинг, дуо қилайлик,
Охират яроғин қўлга олайлик.
Улуғ зот берувчи бизлар сўрайлик,
Барчага етади ахир у конда.

Яратган, инсоф бер барчага ўзинг,
Биламан хоҳласанг бир оғиз сўзинг.
Менга ҳам раво кўр ул ёруғ юзинг,
Кам қилма, Оллоҳим икки жаҳонда.

КЕЛИН КЕЛГУНЧА

Аҳил эдик, иноқ эдик биз
Хонадонга келин келгунча,
Маҳаллага ўрнак эдик биз
Хонадонга келин келгунча.

Укамсиз мен юролмас эдим,
Сафар кетсам туролмас эдим,
Акамга тик қаролмас эдим
Хонадонга келин келгунча.

Сиримизни айтиш йўқ эди,
Аҳдимиздан қайтиш йўқ эди,
Гап тошувчи бойкуш йўқ эди
Хонадонга келин келгунча.

Онам дерди ҳалол топгин ош,
Хизмат бўлса товламагин бош.
Қўрмаганмиз кўзларида ёш
Хонадонга келин келгунча.

Отам оқил бўл деб айтарди,
Насиҳатни такрор қайтарди.
Ўғилларин мақтаб ўтарди
Хонадонга келин келгунча.

Овсинлар бўлишиб жам,
Айиришди бизни тез шунча.
Олти ўғил бирдамлиги ҳам
Хонадонга келин келгунча.

ҚИЗ ТОПГУНЧА

Она сутим оғзимдан келди
Мен ўғлимга то қиз топгунча,
Дўсти душман устимдан кулди
Мен ўғлимга то қиз топгунча.

У танлаган менга ёқмади,
Омад сира кулиб боқмади,
Қанча-қанча сувлар оқмади,
Мен ўғлимга то қиз топгунча.

Қаст қилганлар паст бўлсин дедим,
Жиловланган ас бўлсин дедим,
Келин-куёв мос бўлсин дедим,
Мен ўғлимга то қиз топгунча.

Кесилмаган узун соч бўлса,
Майка-шиммас хонатлас кийса,
Суюнчи бор, айтинг, ким билса,
Мен ўғлимга то қиз топгунча.

Тайёрласа лазатли овқат,
Десанг ота-онангга раҳмат,
Ато қилсин дуо қил, Шавкат,
Мен ўғлимга то қиз топгунча.



ТУШДИ

Ҳаёт мени чорлаганди ўлишга,
Тақдирнинг тўқмоғи бошимга тушди.
Қанчалик уринмай парҳез қилишга
Даҳри дуннинг гарди ошимга тушди.

Жилваланиб ёшлик ўтди хуснкор
Юрагим ёр васлин қўмсамай бир бор.
Энди бошга қўнган рутубатли қор
Сочни писанд қилмай қошимга тушди.

Орзуларим сароб ё бир сас бўлди,
Маломат тошлари басма-бас бўлди.
Йиғламоқ мен учун ё ҳавас бўлди
Ишим такрор кўзда ёшимга тушди.

Аччиқ унларимга бериб сўроқни,
Ғанимга олдириб қўлда яроқни,
Оташда ёнмаган ишқсиз юракни
Тоққа улоқтирдим тошимга тушди.

ЭРКА ЎҒИЛ

Ҳовлимнинг чеккасидан
Анор эккандим тўрт туп,
Айланай соққасидан
Роса тўйибдику хўб

Парваришлаб астойдил
Тагига сув қуярдим,
Етилишин қистаб дил
Дийдориға тўярдим.

Бу йил билдим тилини
Шу сабаб кўп меваси,
Тозаладим гулини
Осон экан шеваси.

Бир куни кўшни ўгил
Анорларни узарди,
Мени кўриб у савил
Бир оз ранги бўзарди.

Уйига тез югуриб
Отасини бошлади,
Лабларидан тупуриб
Кўзларини ёшлади.

Ота деди боламни
Кўрқитибсан хўб ёмон,
Кўзим оқу қорамни
Кўриб қўй ранги сомон.

Эй нодон, бу ёш бола
Энди ўн бирга тўлган,
Кўрсанг тескари қара
Ўгил бир шўхлик қилган.

Хуллас гапини бўлиб
Ўзимни оқлолмадим,
Аксига изза бўлиб
Шаънимни сақлолмадим.

Узр энди, кўшнижон
Жанжалга ярамайман,
Бошқа сафар, сен ишон,
Олса ҳам қарамайман.

Бу ҳам менга бир сабоқ
Ҳаётдан дарс олганим,
Қарамай кетмасданоқ
Айбим кўриб қолганим.



ҚЎМСАШ

Хар тонгда қаршилар эди лолазор,
Қуёш уфққа чиқмай сен ҳам келардинг.
Пойингда гулларга бермай деб озор
Нозик қадамингни секин қўярдинг.

Мен дердим бу қизга сўз отмоқ мушкул
Теграсида қанча ошиқ парвона,
Не фойда жонингни айламоқдан кул
Лайлиниг уйида Мажнун ягона.

Кулсанг ўйғонгандай бўларди баҳор,
Ҳаёдан инграрди гуллар ноласи.
Бахтли келинчакка айтгандай ёр-ёр,
Шамолда ўйнарни сочинг толаси.

Кипригингга шабнам гар қўнган кунда,
Титраб артгим келар эдику ахир.
Зарҳал тўлишган ой нурлари тунда
Сенинг сийратларинг олдида тахир.

Балки бу ҳаётдан бахтлисан аммо,
Умринг ўтмоқдадир гулдирос солиб,
Менинг зорларимга йиғлагай само,
Ҳаёлларим кетди тоғларда қолиб.

Задли унларимку йўлингга нисор,
Қайтмас яратганнинг гўзал у они.
Саргашта орзулар эдику ғаддор,
Наҳот бир ўзимман ҳаё қурбони.

БЎЛСИН

Боғу-баҳор дейинму,
Тоғда райҳон дейинму,
Зилол-зилол дейинму,
Ё бир ҳилол дейинму,
Бир қиз кўрдим во ажаб
Сочлари гажак-гажак.

Боғда олма бўлади,
Пишиб ерга қулади.
Қиз бола ўн еттида,
Ишқ дардини билади.
Қиз бола, ҳо қиз бола,
Ширин-ширин сўз бола.

Осмонда, ҳой ой булоқ,
Шовуллаган сой булоқ.
Гижинг-гижинг ўйнайди,
Гуё саман той булоқ.
Баҳор бўлсин, боғ бўлсин
Осмонўпар тоғ бўлсин.

Ўткинчи, эй шамоллар,
Қуриб кетсин ёмонлар.
Ёшлигингда ўйнаб қол,
Келди яхши замонлар.
Номус бўлсин, ор бўлсин,
Гўзал қизлар бор бўлсин.



ЗУЛФИЯ

Кўзларинг ёшланибди
Нима бўлди, Зулфия,
Тақдир сенинг устингдан
Наҳот кулди, Зулфия.

Истагим ҳолинг билмоқ,
Сенга ярашар кулмоқ.
Синглим, сени қай гумроҳ
Хафа қилди, Зулфия.

Ой деса ой юзинг бор,
Чарақлаган кўзинг бор,
Айтолмаган сўзинг бор,
Юрак билди, Зулфия.

Номардлар қилмишидан
Ор қилмайди, Зулфия,
Мард эркак ўз ёрини
Хор қилмайди, Зулфия.

КЕТМАГИН

Кўзларимни ёшга тўлдириб,
Болалигим, ташлаб кетмагин.
Бошга оппоқ қиров ёғдириб,
Болалигим, ташлаб кетмагин.

Нима десанг дегин ўксинмам,
Қўлингни ол менинг кўксимдан.
Айириб сен ёшлик дўстимдан,
Болалигим, ташлаб кетмагин.

Сенсиз менга кечалар узун,
Ажин босар тарк этсанг юзим.
Ўтинаман эшит бир сўзим,
Болалигим, ташлаб кетмагин.

Янчиб олмай бўйраларимни,
Тирнамагин тийраларимни.
Ҳазон қоплаб теграларимни,
Болалигим, ташлаб кетмагин.

КЕЛА ҚОЛ

Ҳуснда тенгги йўқ малоҳат,
Ёнимга келақол, ёнимга.
Боқилинг бу жонимга роҳат,
Ёнимга келақол, ёнимга.

Коқилинг ўзингга безакми,
Ё менга қўйилган тузоқми.
Висолинг шунчалар узоқми,
Ёнимга келақол, ёнимга.

Тоғларда сайр этиб юрайлик,
Бирга гуллолар терайлик.
Ошиқлик гаштини сурайлик,
Ёнимга келақол, ёнимга.

Ой ҳам хижолатда юзингдан,
Сўзласанг бол томар сўзингдан.
Ўлгунча қолмасман изингдан,
Ёнимга келақол, ёнимга.

Сенсиз дунё қаро кўринди,
Жоним, қадринг жуда билинди.
Шавкат тузоғингга илинди
Ёнимга келақол, ёнимга.

БЎЛМАЙДИ

Хўтиқни сен қанчалик тарбия қилма,
Эшак бўлар, аммо одам бўлмайди.
Зоти пастни сиртдан яхши деб билма,
Унинг босган изи қадам бўлмайди.

Кўнглида бўлмас ҳеч зарра яхшилик,
Тегар жойга борар қилар бахшилик.
Ўзга косасида кўрса бир илик,
Тумшуқ суқар бунга гумон бўлмайди.

Токи аҳмок бошга тушмагунча тош,
Кўзидан оқмайди зарра томчи ёш.
Ҳар банда ҳалолдан топмас экан ош,
Йўқса бу замон ҳам замон бўлмайди.

Шавкат бўлгин доим номарддан узоқ,
Эсингдан чиқмасин бу дунё тузоқ.
Яхшилардан олар бўлсанг сен сабоқ
Шунда икки дунёнг ёмон бўлмайди.

ҚОЛМАДИ

Дардимни кимса билмади,
Яшашдан маъно қолмади.
Ёрим ёнимга келмади,
Яшашдан маъно қолмади.

Ихтиёр қўлдан йўқолди,
Бошимга ташвишлар солди.
Нозланиб жонимни олди,
Яшашдан маъно қолмади.

Гулзордан гуллар термасам,
Узатиб ёрга бермасам.
Бахтимни ундан кўрмасам,
Яшашдан маъно қолмади.

Кўз ёшим дарё бўлдику,
Сабр коса ҳам тўлдику.
Баҳорсиз ёзим келдику,
Яшашдан маъно қолмади.

ДУНЁ

Келсанг ёқангдан илади
Кетгунингга қадар дунё,
Сездирмай устингдан кулади
Ҳийласи кўп алдар дунё.

Гоҳо бериб гоҳо олиб,
Бошингга ташвишлар солиб.
Ишончингга кириб қолиб,
Сўнг сени тарк этар дунё.

Иззат қилар бормасини,
Сийлайди у билмасини.
Қўйлагингни тугмасини
Аста-секин сўтар дунё.

Мол дунём бор деб керилма,
Тўғри йўлдан ҳеч бурилма.
Бу ҳаётда сен урилма,
Барчамиздан ўтар дунё.

Йўқларидан борлари оч,
Ортган сари у яланғоч.
Яқин борма улардан қоч
Мардларини сотар дунё.

Айланайин кундузингдан
Қуёш, ой ва юлдузингдан
Фурсат етса илдизингдан
Бил, суғуриб отар дунё.

Безамасдан арчамизни,
Тайёр қилар дарчамизни.
Эртаю кеч барчамизни
Ўз домига тортар дунё.

Аҳмоқ одам айбин билмас,
Пушаймондан фойда бўлмас.
Айтгин, Шавкат, кимлар ўлмас,
Бу бошингга етар дунё.

ЧИРОЙЛИ ҚИЗ

Ёнимга келди бир қиз,
Ойми у ёки юлдуз.
Жамолига тариф йўқ,
Кечалар бўлди кундуз.

Юзлари мисли офтоб,
Онаси берган одоб.
Бунча гўзал бўлмаса
Ақлимни олди войдод.

Дудоғида холи бор,
Лабларида боли бор.
Ҳаёли ва иболи,
Бахти бор, иқболи бор.

Сўрадим мен исмини,
Нозланиб у айтмади.
Кўнгил қўйгани борми
Аҳдидан ҳеч қайтмади.

Ой чиройли қиз,
Вой чиройли қиз,
Бундан ортиқ бўлмас
Энг чиройли қиз.

ЧИМИЛДИҚ

Чак-чаклишиб шўх янгалар толмасин,
Чимилдиққа кирмаган қиз қолмасин.
Тўйга келган қариндошлар ҳормасин,
Чимилдиққа кирмаган қиз қолмасин.

Палахмон тошидек майли отишсин,
Тушган жойига мос бўлиб қотишсин.
Ҳаёт синовидан тоймай ўтишсин,
Чимилдиққа кирмаган қиз қолмасин.

Чимилдиқнинг сири, билинг, ўзгача,
Шу сабаб урф бўлиб келган бизгача.
Аҳд паймон қилишиб сўнгги сўзгача,
Чимилдиққа кирмаган қиз қолмасин.

ХУРШИДА

Кулиб турган кўзингиз,
Юзингизга мос жуда.
Сизнинг ҳар бир сўзингиз
Болдан ширин, ХУРШИДА.

На ғам бордир, на алам,
Сизла гўзал бу олам.
Таърифлашга тилим ҳам
Сўз тополмай оввора.

Сиз боғдаги баҳорсиз,
Зилол-зилол анҳорсиз.
Паймонам тўлар сизсиз
Калбимни қилманг яра.

Хуршидахон, Хуршида,
Ёқимлисиз сиз жуда.
Сиздан олган ҳур пари
Чиройини, аслида.

НИЛУФАРГА

Нилу, Нилу, ай Нилу,
Қоши камон, ёй Нилу,
Бир дам келгин ёнимга,
Ором бергин жонимга.

Нилу, Нилу, ай Нилу,
Қоши камон, ёй Нилу,
Келмас бўлсанг ёнимга,
Ўт қўяман жонимга.

Нозингни қайдан олдинг,
Юрагимга ўт солдинг,
Бу оҳу кўзларинга
Қарамай бўлмас, Нилу.

Ишқингда гадо қилдинг,
Йўлингда адо қилдинг,
Сочларингни силашга
Қўлим етгайми, Нилу.

Ай-ай, ай Нилу,
Юзлари ширмон Нилу,
Ай-ай, ай Нилу,
Соғиндим сени, Нилу.

КЕЛАДИ БИР КУН

Сочи товонига тушган демасман,
Зулфи яноғини қучган демасман.
Мендан осонгина кечган демасман,
Ўзалим раҳм айлаб келади бир кун.

Тоққа арзим айтиб қўнглимни ёрсам,
Бағрим совугайми зах лойга қорсам.
Жабрини унутиб ёнига борсам,
Ҳолимни тушуниб билади бир кун.

Чарос қўзларига боқишим қўмсаб,
Нозлари жонимга ёқишин қўмсаб,
Чаккасига гуллар тақишим қўмсаб,
Жилғадек ёнимга елади бир кун.

Унутиб кетолмас қишдаги қорни,
Лолага бурканиб келган баҳорни.
Сокин кечаларда кезган анҳорни
Соғиниб ой каби тўлади бир кун.

Менингдек бормикан ошиқу мастон,
Шаънига бағишлаб ёзарман достон.
Умримиз айлабон у боғи бўстон,
Барибир менга ёр бўлади бир кун.



ҚОЛМАДИ

Гўзал, кўрган кунимдан бошлаб
На оромим, сабрим қолмади.
Йўллларингда кўзларим ёшлаб
Дилда борим, сабрим қолмади.

Чин ошиққа шунча ситамми,
Учратганим ёки хатомми,
Севиб қолмоқ, айтгил, мотамми,
Эй нигорим, сабрим қолмади.

Ошёнингда шартларинг оғир,
Кўтаролмай елкалар яғир.
Раҳм қилмоқ қўлингда, ахир.
Сарви боғим, сабрим қолмади.

Айт, не қилай, жондан кечайми,
Ҳар тўрт тараф ёндан кечайми,
Ёки хонимондан кечайми,
Дилоромим сабрим қолмади.

КЕЛАРМИ

Ёрим сочин силаган шамол
Кўнгил розин айтиб еларми,
У фариштам, юзлари ҳилол
Йиллар кутсам қайтиб келарми.

Дилозорни илк кўрган чоғим
Юрагим ҳам у билан кетди,
Ситамидан куйди димоғим
Фарёдларим осмонга етди.

Не азобда ўтмоқда туним
Сен бахтиёр, сен ҳамиша шод,
Алдовингга қолди бу куним,
Сен ҳам мени этарсанми ёд.

Кўзим ёшлаб кетишдан ўзга
 Сарвинозим чорам қолмади.
 Ишонибман бир оғиз сўзга
 Ёлғонигни юрак сезмади.

Қишдан нари ўтмаган севгим,
 Баҳоргача етмаган севгим,
 Таскин бермас қирдаги лола,
 Сочларингдек оққан шалола.

КЕЛГИН

Ҳуснда яғонам, моҳи тобоним,
 Гулларнинг раъноси боғи бўстоним.
 Аразингни қўйгин ёруғ жаҳоним,
 Мана баҳор келди бир бора келгин,
 Йўлларингда бўлдим оввора, келгин.

Нега ташлаб кетдинг, ёру жанона,
 Сенсиз кеча-кундуз нурдан бегона,
 Бир умр ёнингда бўлай парвона,
 Мана баҳор келди, бир бора келгин,
 Йўлларингда бўлдим оввора, келгин.

Наҳот унутолдинг аҳд-паймонимиз,
 Ғанимлар касрига куйди жонимиз,
 Севмоқлик айб бўлса сатқа қонимиз,
 Мана баҳор келди бир бора келгин,
 Йўлларингда бўлдим оввора, келгин.

Дилимда дард тошар, сийнамда алам,
 Кўз ёшимга гувоҳ қўлдаги қалам.
 Гўзалим, дардимга ўзингсан малҳам,
 Мана баҳор келди, бир бора келгин,
 Йўлларингда бўлдим оввора, келгин.



СИНГЛИМ

Ўйинқароқ, гўзал шўх синглим,
Айтгин, сени не дард қийнайди.
Кўзларингдан сизди бу кўнглим,
Айтгин, сени не дард қийнайди.

Бир кун унут бўлар бу кунлар,
Бахтнинг ўзи кафтингга қўнар.
Унут бўлар залворли тунлар,
Пешонангда иқболинг кулар.

Қир-адирдан келар совчилар,
Кўнгилларни шавққа тўлдириб.
Пойларингга гунча очилар,
Севгисини сенга билдириб.

Билсанг, недир мени ҳам қийнар,
Тонг отгунча уйқум келмайди.
Хаёлларим титкилаб ўйнар,
Кўл узатсам тутқич бермайди.

Ўйинқароқ, гўзал шўх синглим,
Айтгин, сени не дард қийнайди.
Кўзларингдан сизди бу кўнглим,
Айтгин, сени не дард қийнайди.

БЎЛАСАН

Чўмсам хаёлларга пайдо бўласан,
Сокин хилватларга чорлайсан мени.
Булбулни маст айлаб шайдо қиласан,
Кун сайин ўзингга боғлайсан мени.

Куёш тоғдан оша мўралаганда,
Капалакдек учиб кафтимга қўнсанг.
Баҳор гулларини саралаганда,
Сенинг борлигингдан акс олган, билсанг.

Майсалар соғинди қўмсаб пойимиз,
Юргил, сайр этайлик, юргил, малагим.
Яна чорламоқда хилват жойимиз
Наҳот бажармасанг битта тилагим.

О қандай унутай тотли дамларни,
Музлаган қалбимга илҳом бахш этган.
Жаннатга алишмам ўша онларни,
Эҳтиросли севгинг дилга фош этган.

Минг ҳадикла олган биринчи бўсам,
Кўз ўнгимдан кетмас такрор, ошкора.
Қанийди не сабаб кетганинг билсам,
Топган бўлармидим бирор бир чора.

Наҳотки барига қўя олсанг чек,
Айбни ағдариб эски тўнимга.
Кўз ёшим оқизсанг худди дарёдек,
Лаънат дейман сени кўрган кунимга.

ОТАМДАЙ БЎЛГАН БОРМИ

Бу жумбоқли жаҳоннинг
Сирини билган борми,
Шу беш кунлик дунёда
Отамдай бўлган борми.

Мусофир, тутинг ёдда,
Охиринг чўбин отда.
Сабр ва қаноатда
Отамдай бўлган борми.

Етим қолган, оч қолган,
Онасидан ёш қолган
Бардошу матонатда
Отамдай бўлган борми.

Елка меҳнатдан яғир,
Сўранг бутунми бағир.
Хизмату шижоатда
Отамдай бўлган борми.

Намозни канда қилмай,
Шайтон сўзига кирмай.
Иймони эътиқодда
Отамдай бўлган борми.

Осмон ерга қуласа,
Ажал бошни силаса.
Виждони фарогатда
Отамдай бўлган борми.

Оғиздан кетса забон,
Кимса қолгайми омон.
Дунё-ю охиратда
Отамдай бўлган борми.

СЎРАБ ҚЎЙГИН ҲОЛИМНИ

Бугун элимда базм,
Кириб келди наврӯзим.
Эшит охирги сўзим,
Рад қилмагин зоримни
Сўраб қўйгин ҳолимни

Бир тиловчинг бўлайин,
Бахт сўровчинг бўлайин,
Ё қаровчинг бўлайин,
Рад қилмагин зоримни
Сўраб қўйгин ҳолимни.

Ўзгада йўқ бу чирой,
Юзингга ўрнашган ой.
Кипригинг отмоққа шай,
Рад қилмагин зоримни
Сўраб қўйгин ҳолимни

Сен ўзингни билмайсан,
Ё аксингни кўрмайсан.
Куёшдан фарқ қилмайсан,
Рад қилмагин зоримни
Сўраб қўйгин ҳолимни

Юлдуздек учиб ўтдинг,
Хаёлим қучиб ўтдинг.
Умримни кечиб ўтдинг,
Рад қилмагин зоримни.
Сўраб қўйгин ҳолимни.

ИШОНМАНГ

Арзимни айтиб зора
Суйдим десам ишонманг,
Ишқида пора-пора
Куйдим десам ишонманг.

Шайдо бўлиб бориға
Олма-ю анориға,
Ярамай ҳеч кориға
Келдим десам ишонманг.

Кезмай ишқин тоғини,
Сайр айламай боғини.
Силамай яноғини
Сўлдим десам ишонманг.

Найранги кўп фалакни,
Синдирар зўр билакни.
Энди у тош юракни
Билдим десам ишонманг.

Ишим тушиб золимга,
Заҳар қўшиб болимга.
Йиғламайин ҳолимга,
Кулдим десам ишонманг

Олдирдим деб ошимни,
Оқизиб кўз ёшимни.
Оёғига бошимни
Қўйдим десам ишонманг.

Унутолмай юзларин,
Икки чаррос кўзларин,
Босиб кетган изларин,
Ўпдим десам ишонманг.

Халос бўлмай ҳеч гарддан,
 Теграмни босган гуртдан,
 Жисмим ёниб шу дарддан,
 Ўлдим десам ишонманг.

КЎРИБ

Йўлларингга қарамай қўйдим,
 Ўзгага ёр бўлганинг кўриб.
 Сен ҳақингда ўйламай қўйдим,
 Ўзгага ёр бўлганинг кўриб

Осмондаги ойга қадаб кўз,
 Муҳаббатдан тотдим аччиқ туз.
 Ёзим келмай кириб келди куз,
 Ўзгага ёр бўлганинг кўриб.

Дардлашмоққа чорлагим кимни,
 Кимга бўшатурман ичимни.
 Кимдан олай энди ўчимни,
 Ўзгага ёр бўлганинг кўриб.

Кетмоқдасан ёр-ёр ила ҳай,
 Қуёшимни булут тўсгандай.
 Бағрим ёнар худди оловдай,
 Ўзгага ёр бўлганинг кўриб.

Кўнглим қолди баридан тўйдим,
 Кўрганларим эҳ тушга йўйдим.
 Севгингга ҳам келар ўт қўйдим,
 Ўзгага ёр бўлганинг кўриб.

Бебақодир кўнгил саройим,
 Тор тобутда охири жойим.
 Дейман бахтли бўлгин илойим,
 Ўзгага ёр бўлганинг кўриб.

МАСТОНАГА

Мажнунтолнинг бўйида,
Не сир бордир ўйида,
Хаёли паришон қиз
Гўё кўкдаги юлдуз.

Мен ёқтирган гўшадир,
Излаганим ўшадир.
Исмин айтсам Мастона,
Сўзлари дона-дона.

Нақорат:

Мастона қиз, Мастона,
Ишқингдаман девона.
Кул бўлдим ёна-ёна,
Қачон кўрурман яна.

Муҳаббатдан сўз очдинг,
Хаёлим олиб қочдинг.
Сармаст бўлдим қўзингга,
Кўз қамашар юзингга.

Сийратинг нисор айла,
Ёрим деб мени сайла.
Хокисор бир зорингман,
Қўлдаги дуторингман.

ЎҒЛИМГА ТИЛАГИМ

(Феруза опада)

Ўнта бўлса ўз ўрни бор, бил,
Қирқта бўлса қилиги аён.
Менда эса ёлғиз бир ўғил,
Шу ўғлим деб яшарман ҳар он.

Мендан қолар танҳо изгинам,
Фарруҳжоним аҳдингни берсин.
Хурдек бевақт кетди қизгинам,
Энди сенинг бахтингни берсин.

Кечага ой, кундузга қуёш,
Хонадоним нурларга тўлди.
Ўлди демам, кўзга олмам ёш,
Ана қизим ўрнига келди.

Топишибди икки соф юрак,
Узукка кўз қўйгандек гўё.
Ойижонинг билдирар тилак,
Оллоҳимдир бергувчи зиё.

У

Қанча қийнок бўлса берурман бардош,
Инжиқ табиатга қилурман тоқат.
Руҳимга далдадир ўша қаламқош,
У менга яшашга куч берар фақат.

Бўронлар қутирсин, майли беомон,
Нозик бу жисмимга таъсир қилсин ҳам.
Хаёл уммонларим сузар у томон,
Гирдоб йўлиқмаса бу балолар кам.

Эҳтимол бир кичик ҳазил қилгандир,
Қисматнинг давомин кузатмоқ бўлиб.
Ўтгувчи ҳисга ҳам севдим дегандир,
Ўйнамоқ бўлгандир устимдан кулиб.

Балки йўлларимиз тушар кўп йироқ,
Балки кимларгадир бўларман кулгу.
Мен ҳам ҳеч нарсани йўқотмам бироқ,
Чунки шеърларимга илҳом берган у

ИРОДАХОНГА

Иродахон, Ирода,
Сен ҳаммадан зиёда.
Одобинг ундан яхши
Сен ягона ҳаёда.

Сен кўкдаги ё ҳилол,
Сочларинг чашма зилол.
Сендаги гўзалликни,
Таърифлашга тилим лол.

ЗЕБОГА

Парима ё, пайкарми ё,
Бир қизни кўрдим
Сунбул сочли, мовий кўзли,
Юлдузни кўрдим.

Исми Зебо, жисми Зебо,
Борлиги Зебо.
Кўргаларим ичра ёлғиз,
Нозанин танҳо.

ВАТАН

Буюк боболарнинг асрий орзуси,
Истиқлол эркинга берди зўр қанот.
Энди сен бўлгайсан жаҳон кўзгуси
Сени чорламоқда янгича ҳаёт.

Ҳар бир сарҳадларинг кўз қорачигим,
Уни қўриқлашдир энг олий бурчим.
Амир Темур авлодга кўрсатган ўғит,
Ватан хизматида доим тик тургим.

Асрларга татир оққан кўз ёшим,
Етар ғанимларга эгилган бошим.
Халқим ишончини оқлаган инсон,
Бизга мададкордир азиз юртбошим.

Нақорат:

Эй улуғ Ватаним, суюк Ватаним,
Жоним сенга фидо, буюк Ватаним



БАҲОР

Бу йил қиш мавсуми узоқ чўзилди,
Диққинафас бўлдик баҳорни кутиб.
Кўнгил ришталари бир оз узилди,
Кел гўзал, ёнимга барин унутиб.

Ниҳоят юз очди сен кутган баҳор,
Кўм-кўк майсасини пешлаб биз томон.
Ирмоқлар талашиб оқмоқда анҳор
Мангулик қудратин ҳис қилгансимон.

Лолалар куйлашиб рақсга тушар,
Қуёш нурларидан олиб созини.
Бу макон абадий жаннатга ўхшар,
Кўз-кўз қилиб қирлар айлар нозини.

Севаман қах-қаха отиб кулишинг,
Сочларинг булутдек осмонни тўсса.
Сенинг ҳам баҳордан бордир улушинг,
Гуллар лабларингдан қўмсайди бўса.

Илтимосим мендан сўрамагин ҳеч,
Қайси фаслларни яхши кўришим.
Афсуски, баҳорим кириб келди кеч,
Саробдай туюлар сенла бўлишим.

НЕТАЙ

Бир жонона ишқида овворо бўлдим нетай,
Кўрдиму жамолини садпора бўлдим нетай,
Кўзимдан ёшлар оқиб фаввора бўлдим нетай,
Чора йўқ ғамдин ўзга ғамхона бўлдим нетай,
Дўсти душманлар аро овоза бўлдим нетай.

Белни боғлаб мардона унта етмоқ истадим,
Дил изхоримни тўкиб хатга битмоқ истадим,
Шамолдан рашким келиб қўлим тутмоқ истадим,
Во дариғо келмаса заҳар ютмоқ истадим,
Оқибат аҳволим танг ё сазо бўлдим нетай.

Йўлларин пойлай-пойлай боришга ҳам юз қолмади,
Кўлларин бигиз қилиб қарамаган кўз қолмади,
Ўпай десам изларин суворимдин из қолмади,
Гулшаним офтобимга айтилмаган сўз қолмади,
Энг сара сўзларимдин чин тоза бўлдим нетай.

Хур, пари ё моҳитобон бундан ортиқ бўлмасов,
Санамлар ичра танҳо ўзга гулрух бўлмасов,
Жаҳонимнинг жонига мендек тасаддуқ бўлмасов,
Эй Шавкат, бундай жанон ҳар кимга тортиқ бўлмасов,
Ҳарна бўлса жонимга минг бало бўлдим нетай.

МУНДАРИЖА

Аёллар	3
Шеърят	3
Шайтон турибди	4
Ким қолар?	5
Бобо деҳқоним	6
Какайдим	7
Бўлмаса	8
Билмайсизми?	9
Кўргим келади	10
Севгимдан тондим	11
Бариси ёлгон	11
Сурхонимнинг қизлари	12
Онажоним	13
Сўз яхши	14
Икки қиз	14
Эсладим	15
Бир келса	16
Бўлишинг керак	16
Хафа бўлма	17
Ёқармикан	18
Армонли дамлар	18
Ёт бўлди	19
Қайга бораман	20
Алишер	21
Сиздай бўлолмайди	22
Қизғалдоғим	23
Бўлганда	23
Шахмат ўйна	24
Ўзбекнинг аёли	26
Ўтар	27
Дарвешона қилайлик	28
Бевафо дунё	29
Қоча бошлайди	30
Онажон	31
Сен қайдасан	32
Қурисин	33
Мактабим	33
Орзулар оғушида	34
Кутармикан	34
Зарифа	35

Укам	36
Туртликлар	38
Энди	41
Ёлғончи дунё	42
Керакмас	43
Туртликлар	44
Қилмадинг	45
Келин келгунча	46
Қиз топгунча	47
Тушди	48
Эрка ўғил	48
Қўмсаш	50
Бўлсин	51
Зулфия	52
Кетмагин	52
Кела қол	53
Бўлмайди	54
Қолмади	54
Дунё	55
Чиройли қиз	56
Чимилдиқ	57
Хуршида	57
Нилуфарга	58
Келади бир кун	59
Қолмади	60
Келарми	60
Келгин	61
Синглим	62
Бўласан	63
Отамдай бўлган борми	64
Сўраб қўйгин ҳолимни	65
Ишонманг	66
Кўриб	67
Мастонага	68
Ўғлимга тилагим	69
У	70
Иродахонга	70
Зебога	71
Ватан	71
Баҳор	72
Нетай	73

Адабий-бадиий нашр

Шавкат Хуррамов

ОЙ ТЎЛИШГАН ОҚШОМ

Шеърлар

Муҳаррир:

Луқмон Бўрихон

Техник муҳаррир:

Файзулло Азизов

Мусахҳиҳа:

Нодира Эгамқулова

Дизайнер:

Дилмурод Жалилов

"Turon zamin ziyo" нашриёти

Nashr.lit № AI 171. 2010 йил 11 июн

Тошкент ш. Юнусобод-14. 27/35

Теришга 2013 йил 10 ноябрда берилди.

Босишга 2013 йил 24 декабрда рухсат этилди.

Бичими: 84x108 1/32. "Virtes Times" гарнитурасида
офсет босма усулида офсет қоғозида босилди.

2,25 шарт. б.т. 2,6 ҳисоб нашр. таб.

Адади 1000 нусха. 171-сон буюртма.

"Muharrir nashriyoti" матбаа бўлимида чоп этилди.

100060, Тошкент шаҳри, Элбек кўчаси, 8-уй

E-mail: Muharrir@list.ru